

# **PRAVILNIK O IZMJENAMA I DOPUNAMA PRAVILNIKA O DODJELJIVANJU IDENTIFIKACIONIH BROJEVA, REGISTRACIJI I IDENTIFIKACIJI I EVIDENCIJAMA POREZNIH OBVEZNIKA NA TERITORIJI FEDERACIJE BOSNE I HERCEGOVINE\***

**(“Službene novine Federacije BiH”, broj 19/26)**

## **Član 1.**

U Pravilniku o dodjeljivanju identifikacionih brojeva, registraciji i identifikaciji i evidencijama poreznih obveznika na teritoriji Federacije Bosne i Hercegovine ("Službene novine Federacije BiH", br. 69/17, 17/18, 32/20, 89/22, 36/24, 27/25 i 79/25) u članu 13. stav (8) briše se.

## **Član 2.**

Iza člana 13a. dodaje se novi član 13b. koji glasi:

"Član 13b.

(Promjena sjedišta unutar BiH)

(1) Uslijed preseljenja sjedišta privrednog društva ili organizacije sa teritorije Republike Srpske ili Brčko Distrikta Bosne i Hercegovine u Federaciju Bosne i Hercegovine, Porezna uprava dodjeljuje identifikacioni broj poreznog obveznika kao u postupku registracije novog pravnog lica.

(2) Lice iz stava (1) ovog člana Obrazac POR-500 dostavlja uz sljedeću dokumentaciju:

a) rješenje nadležnog suda o upisu promjene sjedišta (kopija uz original na uvid),

b) ugovor o vođenju računovodstvenih poslova, ukoliko poslovne knjige vodi drugo pravno ili fizičko lice (ovjerena kopija ili original),

c) dokaz o pravnom osnovu korištenja poslovnog prostora (ovjerena kopija ili original),

d) identifikacioni dokument podnosioca zahtjeva (na uvid) ili punomoć za podnošenje obrasca za punomoćnika (original ili ovjerena kopija).

(3) Ukoliko je preseljeno lice prije preseljenja sjedišta imalo registrovane poslovne jedinice na teritoriji Federacije Bosne i Hercegovine, dužno je uz Obrazac POR-500 dostaviti i Obrasce POR-501 radi usklađivanja poreznih identifikacionih brojeva poslovnih jedinica (PJIB). U tom slučaju preseljeno lice je dužno:

a) podnijeti odjavu ranije dodijeljenih PJIB-ova na Obrascu POR-501,

b) podnijeti prijavu PJIB-ova na Obrascu POR-501 za poslovne jedinice koje nastavljaju obavljati djelatnost nakon preseljenja sjedišta.

(4) Porezna uprava će prijavu i odjavu poreznih identifikacionih brojeva poslovnih jedinica iz ovog člana provesti istovremeno, u okviru jedinstvenog postupka registracije, bez parcijalnog rješavanja zahtjeva.

(5) Uslijed odseljenja sjedišta privrednog društva ili organizacije sa teritorije Federacije u Republiku Srpsku ili Brčko Distrikt, objavljuje se identifikacioni broj poreznog obveznika od strane Porezne uprave. Odseljeno lice Obrazac POR-500 dostavlja zajedno sa sljedećom dokumentacijom:

a) rješenje nadležnog suda (kopija uz original na uvid)

b) identifikacioni dokument podnosioca zahtjeva (na uvid) ili punomoć za podnošenje obrasca za punomoćnika (original ili ovjerena kopija).

(6) Ukoliko je odseljeno lice prije odseljenja sjedišta imalo registrovane poslovne jedinice na teritoriji Federacije Bosne i Hercegovine, dužno je uz Obrazac POR-500 dostaviti i Obrasce POR-501 radi usklađivanja poreznih identifikacionih brojeva poslovnih jedinica (PJIB). U tom slučaju odseljeno lice je dužno:

a) podnijeti odjavu ranije dodijeljenih PJIB-ova na Obrascu POR-501,

b) podnijeti prijavu PJIB-ova na Obrascu POR-501 za poslovne jedinice koje nastavljaju obavljati djelatnost nakon odseljenja sjedišta.

(7) Ukoliko lice ne postupi u skladu sa ovim članom najkasnije u roku od pet dana od dana zaprimanja rješenja o promjeni sjedišta, takvo postupanje smatrat će se nezakonitim poslovanjem u smislu člana 66. Zakona, te će se neposredno primijeniti odredbe člana 94a. Zakona."

## **Član 3.**

U članu 14. stav (5) briše se.

\* Pravilnik je objavljen u "Službenim novinama Federacije BiH", broj 19/26 od 11. marta 2026. godine, a stupio je na snagu 19. marta 2026. godine.

#### **Član 4.**

Član 19. mijenja se i glasi:

"Član 19.

(Predregistracija)

(1) Na zahtjev nadležnog suda Porezna uprava će u postupku elektronske registracije dodijeliti pripadajući privremeni identifikacioni broj poreznog obveznika (PJIB):

a) kod nastanka poslovnog subjekta, nakon što utvrdi da njegov osnivač ili s osnivačem povezano pravno lice ili vlasnik nema neizmirenih poreznih obaveza iz njene nadležnosti;

b) uslijed promjene sjedišta privrednog društva sa teritorije Republike Srpske ili Brčko Distrikta u Federaciju;

c) kod nastanka stečajne mase kao subjekta postupka (SM-SPR i SM-SPS)

d) kod usklađivanja sa propisima o privrednim društvima za pravna lica koja nemaju strukturu PJIB iz člana 7. ovog pravilnika.

(2) Na zahtjev nadležnog suda koji ne primjenjuje Jednošalterski sistem, Porezna uprava će dodijeliti pripadajući privremeni identifikacioni broj poreznog obveznika (PJIB) kod nastanka poslovnog subjekta, nakon što utvrdi da njegov osnivač ili s osnivačem povezano pravno lice ili vlasnik nema neizmirenih poreznih obaveza iz njene nadležnosti.

(3) Ako sud iz stava (2) ovog člana dostavi zahtjev za dodjelu privremenog PJIB u slučajevima iz stava (1) tač. b), c) i d) ovog člana, Porezna uprava postupa po takvom zahtjevu.

(4) Iznimno st.(1) i (2) ovog člana, s osnivačem povezano pravno lice ne uključuje pravna lica koja su u stečaju, ili pravna lica koja su brisana iz registra nadležnog suda.

(5) S osnivačem povezano pravno lice iz st. (1) i (2) ovog člana smatra se drugo pravno lice u kojem osnivač posjeduje direktno ili indirektno 51 ili više procenata vrijednosti ili broja dionica ili glasačkih prava.

(6) Ukoliko Porezna uprava utvrdi da osnivač ili s osnivačem povezano pravno lice ili vlasnik ima neizmirenih poreznih obaveza, Porezna uprava će obustaviti proces dodjeljivanja identifikacionog broja poreznog obveznika dok se ne izvrši izmirivanje poreznih obaveza, osim kod nastanka stečajne mase kao subjekta postupka (SM-SPR i SM-SPS).

(7) Porezna uprava je dužna odgovoriti u roku od 24 sata od sata prijema zahtjeva nadležnom sudu. Komunikacija između suda i Porezne uprave odvija se elektronskim putem.

(8) Postupak obustave dodjeljivanja identifikacionog broja može trajati najduže sedam dana od dana zahtjeva suda. Nakon isteka perioda, Porezna uprava je dužna obavijestiti nadležni sud o ishodu zahtjeva za dodjeljivanje identifikacionog broja.

(9) Ukoliko nadležni registarski sud odbaci prijavu, nadležna jedinica Porezne uprave će poništiti privremeno dodijeljeni PJIB."

#### **Član 5.**

Član 23c. briše se.

#### **Član 6.**

U članu 30. stav (2) iza tačke c) dodaje se nova tačka d) koja glasi:

"d) lica koja su odselila sjedište sa teritorije Federacije u Republiku Srpsku ili Brčko Distrikt."

#### **Član 7.**

U članu 44. iza stava (2) dodaje se novi stav (3) koji glasi:

"(3) Preregistracija iz stava (2) ovog člana smatra se promjenom organizacionog oblika iz preduzeća u privredno društvo, koja je upisana u registar poslovnih subjekata nadležnog registracionog suda i potvrđena rješenjem nadležnog suda. U tom slučaju Porezna uprava provodi postupak dodjele identifikacionog broja poreznog obveznika na način i po postupku koji važi za registraciju novog poslovnog subjekta."

Dosadašnji st. (3) i (4) postaju novi st. (4) i (5).

#### **Član 8.**

Ovaj pravilnik stupa na snagu osmog dana od dana objavljivanja u "Službenim novinama Federacije BiH".